

**ATASSUT****UPA 2016/53****Siverth K. Heilmann****16.04.2016**

**Innuttaasut immikkut tamarmik kiassarnermut atukkaminik taamaallaat akiliisaleqqullugit, Nukissiorfinniit kiassarneqartut tamarmik immikkut uuttuutilersorneqarnissaannut Naalackersuisut peqquneqarnissaannik Inatsisartut aalajangiiffigisassaattut siunnersuut. Tamanna aallarteqquneqarpoq kingusinnerpaamik ulloq 1. januar 2017.  
(Inatsisartuni ilaasortaq Michael Rosing, Demokraatit)**

Inatsisartuni ilaasortaq Michael Rosing, Demokraatineersup qulaani qulequtarineqartoq pillugu aalajangiiffigisassaattut siunnersuuteqarneranut imatut ATASSUT-miit oqaaseqassaagut.

ATASSUT-miit paasilluarparput, siunnersuuteqartoq tunngavilersuuteqarmat, kialluunniit atuisutut akiliinissamik pisussaaffeqarnera, kiisalu ilisimaneqarmat pingaartumik inissiani pisoqaanerusuni amerlaqisunilu, sanaartorup nassataanik imaaliallaannaq aaqqinneqarsinnaannginneri pissutigalugit, allatut ajornartumik nuanniigigaluaqalugu, ataatsimoorussamik kiassarnermut il.il. akiliuteqartarnej atuuppoq.

ATASSUT-miilli taamatut ingerlaannartoqarnissaa kissaatiginngilluinnarparput. ATASSUT-miit ersarissarusupparput, Namminersorlutik Oqartussat inissiaataanni pisoqaanerusunilu uuttusersuisoqarnissaa naleqquttutut isiginngilluinnarparput, taamaattorli inissiani nutaanik sanaartornermi innaallagissamut imermullu uuttuutinik ikkussuisarnerit aallartereernikuupput. Taamatullu ineriartortoqaannarnissaa pisussaaffiussasorlu ATASSUT-miit ersarissarusupparput.

Nalunngilara ilaqutareeqarmat, inissiarsuarni pisoqaanerusuni najugaqarnertik pillugu uuttusersuinissamik kissaateqartartunik, pissutsinilli piviusunik paasitineqaraangamik paasinnillutik eqqarsaamminnik taamaatitsigallartartunik. Nunatsinni aamma ikittuunngillat illut uigulukuttunik taasakkagut, ataatsimoorussamik kiassaaserneqarsimasunik aammalu ataatsimoorussamik akiliuteqartartunik. Tamakkuli inissiarsuarnut sanilliullugit pisariinnerusumik aaqqinneqarnissaanut najugaqartut paaseqatigiinnerisigut iliuseqartarmat pitsaalluinnartutut ATASSUT-miit isigaarput.

Taamatut oqaaseqarluta Naalackersuisut allannguutissatut siunnersuuteqarnerat naaperiaatissatut ATASSUT-miit isumaqatigalugu akuersaarparput aammalu ataatsimiititaliami susassaqartumik peqqissaarullugu suliap aappassaaneerneqannginnermini suliarineqarnissaa inassutigalugu.